

La chasa resta, l'editura sto ir

L'avegnir da la Chasa Editura Rumantscha resta intschert

DA ANDREAS CADONAU

■ **La Lia Rumantscha ed il chantun nun èn sa cunvegnids pertutgant la finanziaziun da la Chasa Editura Rumantscha. A la manadra da la chasa editura, Anita Capaul, ha la Lia visà la piazza sin la fin dal mais mars.** Cun la situaziun intscherta pertutgant l'avegnir da la Chasa Editura Rumantscha (CER) ha il secretari general da la Lia Rumantscha, *Urs Cadruvi*, argumentà la visada da la piazza da la manadra *Anita Capaul* sin la fin dal mais mars 2013. El è s'exprimì vers Radio e Televisiun Rumantscha. Intscherta è la situaziun perquai ch'il chantun e la Lia n'èn betg sa cunvegnids pertutgant la cunvegna da prestaziun. Quai vul dentant betg dir ch'i saja definitiva-

main a fin cun ina chasa editura per la Rumantschia. La dumonda davart il futur vegn decidida dals daners che stattan a disposiziun ed influenzeschan il volumen da las ediziuns futuras. Quai ha *Andreas Gabriel* da la Lia Rumantscha confermà sin dumonda. Vinavant sustegnair ediziuns rumantschas vul era la Pro Helvezia. Il pledader da la Lia ha discuri dad ina clera veglia da quell'organisaziun culturala svizra da s'engaschar per las ediziuns rumantschas. Quai dentant betg sco part e purtadra da la CER, mabain cun sustegnair las singulas ediziuns. Bain è la Lia londervi da sclerir in'integraziun dal post da lavur da l'editura en l'atgna chasa. Exequir l'incumbensa dad editur cun agen persunal vul la Lia dentant tuttina betg. Andreas Gabriel ha

punctuà l'indipendenza publicistica da la CER che la Lia vul garantir era vinavant. Uschia vegn ina chasa editura er en l'avegnir dirigida dad in editur u dad ina editura independenta. Pertge pia betg sa cunvegnir cun l'editura actuala, Anita Capaul, sin in nov contract da lavur cun in pli mudest volumen da lavur? Enfin uss era ella engaschada en in piazza parziala da 60 procent. Andreas Gabriel ha explitgà ch'i saja momentan betg stà pussaivel da definir exact il pensum da lavur futur da l'editura e per quel motiv saja la Lia stada da l'avis ch'i saja pli sincer da visar la piazza. E quella mesira stat en incumbensa da l'organisaziun tetgala da la Rumantschia sulet purtadra da la CER cunquai ch'il chantun e la Pro Helvezia en sa retratgs da quella incarica.

In problem persunal per motiv da la visada?

Entaifer la pintga famiglia rumantscha curescha dentant la fama che l'editura e la Lia n'hajan betg il fain sin il medem ladritsch. La Lia haja nizzegià la situaziun da sa deliberar da l'editura. La pertutgada sezza, Anita Capaul, n'ha betg vulì prender posiziun en chaussa. Da la vart da la Lia ha Andreas Gabriel refusà la reproscha da dissonanzas persunalas sco motiv da la visada da la piazza dad Anita Capaul. El ha anc in giada accentuà ils motivs da la situaziun finanziaria intscherta. Davart la lavur da l'editura è betg da chattar vuschs criticas. La CER ha publicitgà entaifer ils trais onns passads 14 ediziuns.